



## ÁŠŠEČILGEHUS | SAKSFRAMLEGG

čoahkkin   møte	: riikkačoahkkin/landsmøte 2018
beaivi ja báiki   tid og sted	: Guovdageaidnu, 30.11. ja/og 1.12.
áššenummar   saksnummer	: 2018/7
áššemeannudeaddji   saksbehandler	: riikkastivrra/landsstyret

mielddus | vedlegg : [Tråante-julggaštus](#) (davvisámegillii)

## 2018/7 SÁMEKONFERÁNSSA TRÅANTE JULGGAŠTUSA RATIFISEREN

NSR lea miellahttun [Sámeráđis](#). Sámiráđđi lea sorjjasmeahttun kulturpolitihkalaš ja politihkalaš ášahus, mii doaibmá Norggas, Ruotas, Ruoššas ja Suomas, ja lea nu gohčoduvvon NGO (Non-Governmental Organization, ii-stáhtalaš organisašuvdna). Sámeráđđi vuodđuduvvui 1956:s ja lea okta dain eamiálbmotorganisašuvnnaiguin mii lea doaibman guhkimus.

Sámeráđđi lea ovttasbargoorganisašuvdna mas lea 15 miellahtu čuovvovaš 9 miellahttoorganisašuvnnain: NSR; Norgga Boazosámiid Riikkasearvi (NBR/NRL); Sámi Álbmotlihttu (SÁL/SFF); Suoma Sámi Guovddášsearvi (SSG); Sámiid Riikkasearvi (SSR); Riikkasearvi Same Átnam; Boazoeaiggáđiid Oktavuoha; Murmanskka Guovllu Sámisearvi / Общественная организация содействия правовому просвещению и сохранению культурного наследия саамов Мурманской области (OOSMO); Guoládaga Sámisearvi / Ассоциация Кольских Саамов.

Lea NSR riikkastivrra mii nammada NSR miellahtuid Sámeráđđái, ja dán áigodagas leaba Christina Henriksen ja Ol Johan Gaup nammaduvvon. Sudno persovnnalaš várrelahtut leaba Beatrice Fløystad ja Beaska Niillas. Henriksen lea Sámeráđi bargolávdegottis.

Sámiráđi váldoulbmilin lea gozihit sámiid ovdduid álbmogin, nannet sámiid oktiigullelašvuoda riikkarájáid rastá álbmogin ja eamiálbmogin, ja bargat nu ahte sápmelaččat maiddái boahttevuodas dohkkehuvvojit oktan álbmogin ja eamiálbmogin, man kultuvrralaš, politihkalaš, ekonomalaš, siviila, sosiálalaš ja vuoiŋnalaš vuoiŋatvuodas sihkkarastojit guđege riikka lágaiguin, šiehtadusaiguin gaskal guoskevaš stáhtaid ja sámiid ovddasteaddji orgánaid, ja álbmotrievttálaš šiehtadusaiguin muđuid: "Mii, sámit, leat oktasaš čearda, eaige riikkaid ráját galgga rihkkut min čeardda oktavuoda."

Sámiráđi doaimma vuodas leat mearrádušat, cealkámušat, julggaštusat ja politihkalaš prográmmat mat mearriduvvojit Sámekonferánsain mat lágíduvvojit juohke 4. jagi. NSR miellahttuvuoha bisuhuvvo Sámekonferánsa julggaštusa ratifiserema bokte. Danne lea áššáigullelaš ahte NSR galgá ratifiseret julggaštusa 20. Sámekonferánsas: Tråante-julggaštusa.

### MEARRÁDUS EVTTOHUS:

NSR riikkačoahkkin 2018 ratifisere Tråante-julggaštusa nu mo dat mearriduvvui 20. Sámekonferánsas Tråantes 2017:s.